

四庫全書

史部

欽定四庫全書

史部

江南通志卷一百五十九

詳校官給事中臣丁雲錦

檢討臣德生覆勘

總校官編修臣王燕緒

校對官助教臣卞維吉

謄錄監生臣陸潮愈

欽定四庫全書

江南通志卷一百五十九

人物志

孝義

三

揚徐二府太海通三州

揚州府

晉盛彥字翁子廣陵人母王氏因疾失明每食必躬  
自哺之母病久婢使數見毒槌婢忿恨伺彥出取  
蟻螯炙飼之母食以為美然疑其異藏其餘示彥

彥見抱母慟哭幾絕母目忽開瞻視如故仕吳至  
中書侍郎晉初舉大中正

高悝廣陵人少孤值歲饑悝蔬食不厭每致甘肥  
於母撫幼弟友愛寓居江州刺史華軼辟為西曹  
書佐及軼敗悝匿其妻子會赦乃出元帝以為叅  
軍位至丹陽尹封建昌伯子嵩

南北朝宋劉宗武廣陵人魏太武南伐至安宜宗武  
母為亂軍所害宗武蔬食終身人號所居村為孝



義鄉

南唐吳元嗣江都人子孫壽皆百歲一門前後義聚不分守臣聞於朝賜義門置義順二臺旌之

宋許叔微真州人篤志經史尤邃於醫建炎初大疫叔微親行里巷為之診療所活甚衆夢神人曰上帝以汝陰功錫汝以官因留語云藥市收功陳樓間阻堂上呼盧唱六作五後第六人登第升第五人在陳祖言樓材之間

吳志興儀徵人世篤孝義其家七世三百年不分  
異積善好施高宗封為迪功郎子汝明嘗割股療  
母疾靈芝生堂側開禧中金兵入境他室廬皆焚  
蕩汝明室獨存嘉定中旌其門

蔣伍寶應人嘉定間母孫氏兩目俱盲伍自剜左  
目和粥以進母目忽明縣上其事詔表所居曰昭  
孝坊

稽聳高郵人布衣尚義文丞相天祥見逐於真州

聳迎事於家資送航海達行在時有工部侍郎柳岳進降表道經其莊聳憤岳賣國殺之

沈正海陵人父使酒毆人死正途遇父見父恐懼狀述其故正遽往佯毆其屍巡者捕正獄具死

元卜勝高郵人母病為嘗糞又割股作糜以進母尋愈泰定間旌表

陳起字起宗為真州獄吏夏月囚多疫起旦暮勞問給醫藥台獄卒諭善視出私財日具湯餌粥食

其後累世貴顯

張緝字士明其先膠州人父宦維揚因家江都至  
正間緝與兄紳弟經俱領山東鄉舉緝授泰州幕  
棄職養親高郵賊兵犯境母方病賊持刀突入舉  
家驚散緝獨以身翼蔽其母背負數創母得以全  
劉信甫揚州人郡富商曹氏僕曹瀕死以孤託之  
孤漸長其叔利孤財妄訴家產未析盡為姪據郡  
守劉察其詐直之叔之子憤訟不勝自鴆其父而

誣弟殺適達嚙齊穆哩者與守不相能竟欲  
置孤法并以中守引致百餘人皆抑使誣質以成  
其獄信甫先匿孤他處身出就讞榜掠無完膚終  
不承孤得脫於難既而叩蹕稱寃達嚙齊以罪  
去守復官

明孫質高郵人元末避兵廣陵值張鑑兵亂質度不  
能俱免謂其妻曰不幸至此若使親殞於兵終天  
之恨奚極遂棄妻奉其父母避之蘇州事親以壽

終明洪武五年還高郵

吳汝寧泰州人洪武初伯兄汝陽謹戍烏撒衛越  
六年歸里心憚遠行臨發愀然汝寧慷慨願代兄  
役行至黃陵廟遇風覆舟死焉

韓福緣儀徵人永樂時以孝旌

張起海陵人父遭兵亂與母相失起號吽博求三  
十年得母於濟陰成廷珪贈詩比之朱壽昌

費廩高郵人母湯氏病劇廩割股和糜以進母啖

而愈其從弟庸亦割股以愈父病人稱雙孝

王鳳字朝陽寶應人喪母年已七十哀毀骨立廬於墓

張佛住高郵人割肝愈母被旌

王沂儀徵人伯父為人所誣謫戍開平天順改元沂重趼上疏訟寃得釋

史得儀徵人兄能為指揮坐法當死得念兄之嗣請於官願以身代兄竟出獄生子得喜曰不負吾

心矣會赦並得釋

王輅江都人年十四割股療父病後母老疾亦如之獲痊

徐恩江都人家貧業農兄弟數人析爨恩獨依膝下父患瘍日夜吮其患處後為盜傷恩奮勇手刃一人盜披靡去母病月餘盛夏恩伏牀下蚊嘍無完膚每晨焚香籲天遇勺者與藥一粒大如粟母服遂愈人疑遇仙時稱徐孝子



王玉泰州人八世同爨弘治中旌

魏全興化人母畏雷全每他出見天欲雨則顛蹶  
遄歸夜見有電光雖宿市塵必鑄門而還抱母卧  
終身不怠

孫著寶應人父鸞嗜飲著嘗置錢酒家密供父飲  
父病割股雜豚肉中父食之尋愈

宮永建字克昌泰州人倭入犯民盡竄永建孑身  
守父柩比閭遭焚劫永建家獨免嘗貸門人顧某

錢顧已歿持金還之家人不復記憶辭永建曰若不受當掘置隧左矣後以進士世其家

吳一瀾字觀瀾以鹽筴客儀徵萬曆二十三年大饑邑令募富戶輸濟多不應瀾適自楚市米歸急白令曰今有米千石糶之可得倍息年饑居奇誠不忍願以半供賑令曰不繼奈何一瀾曰儀距楚千餘里乘風上下月可達也但得毋錢廣糶以子米利貧亦易耳富者感動共集得官民錢若干瀾

周迴釋糶存濟無算

陸典高郵人父龍以義代人任罪謫仙遼東典時  
尚幼弱冠後發憤出塞求親而計適至躡屩往奔  
欲扶櫬歸里而法不得入闕走京師泣陳於當道  
薊督檄護之歸

卞玘字汝用江都人世務農業治家有法五世同  
居事聞旌表

孫諫高郵人割股療父疾創久不愈有人詣其門

出紫色藥傳惠處一二日即無恙巡撫李三才賞  
金以資養令有司歲以粟帛存問

李長敷字維凝興化人天啓辛酉舉人弟長祺早  
卒遺孤清長敷撫之如己子與清同舉於鄉性狷  
介工詩詞

王維慶字裕昆高郵人性至孝妻陳氏能順承維  
慶之志割股以愈姑疾後維慶父病慶曰吾聞割  
股非孝然吾婦行之獲濟傷體愈親猶賢於己亦

割股愈之奉旨旌獎

閩汝梅字和陽江都人崇禎辛未進士授陽穀知縣擢刑部主事為孝廉時知府劉鐸以觸魏闈被逮人莫敢省汝梅獨贈金送其行

張福江都人黃國相之僕明末被兵國相死福顛創甚止氣喉未斷脇下亦被數刃從積屍中以手捧頭匍匐奉主媪匿僻處越數日勢定創稍愈復行遍歷諸營訪覓幼主得之金陵牧場伺夜負歸

黃氏母子復聚福終老其家

繆欽字珍所泰州人泰州舊例代鳳陽輸米徵催與邑漕並急百姓苦之崇禎十一年欽以布衣伏闕上疏會邑人徐耀為都御史力言於戶部得全豁免而高寶興江諸邑之代輸者亦次第蠲除

王師文興化人慷慨好周急里女為奸人誘賣父母不能贖為贖而嫁之嘗持金五百寄逆旅主人同時他客亦寄千金比去主人誤以客橐授之既

行發橐復持還則客方欲訟主人於官師文至乃解  
崇禎末歲大饑令踵門告曰能活吾民者必君也  
師文即捐穀麥數千斛錢數千緡賑之凡邑中義  
舉必首倡焉

江九萬字元里儀徵人與妻黃氏相繼割股療親  
疾

國朝陳嘉謨字我師興化縣學生順治初父弘道為怨  
家誣以私鹽逮繫府獄且屬獄卒絕其橐館內外

隔絕嘉謨丐貸進金於羣小乞一見不許知羣小計必殺之大哭而歸告於城隍之神作血書置袖中出廟門去是夜守舍蒼頭候嘉謨不還忽聞叩門聲若嗚嗚泣者開視無人心怪之翌日有白運使得一函於鈔關口啓視乃嘉謨訟寃血書運使大驚而蒼頭適赴運使訴其事與血書合乃令求嘉謨尸越七日出自鈔關河中氣勃勃如生觀者萬人莫不泣下遂出弘道於獄治誣告者罪



金玉節字元亮江都學生明末兩親柩未葬瘞室  
中有亂卒疑瘞金將剖其棺玉節以身翼蔽長子  
奇選年九歲奪卒刀泣代父死卒免玉節掠奇選  
去適遇僧人呵云小孝子不可殺卒乃投之地得  
還玉節生平有養寡姊撫孤甥全難婦還遺金諸  
義舉可嘉奇選字幼常能世其家學與弟彥選友  
愛不分爨玉節著四書解小學闡證奇選亦著孝  
經闡證性理纂言禮記分類等書

吳愛儀徵人父客死雲南愛年十四欲往覓父柩  
時兵戈塞路人咸阻之忽一日痛哭別其姊曰姊  
善視弟吾不返父柩不歸矣途中三為兵掠崎嶇  
萬狀卒至雲南載父柩歸

程孝子揚州人母歿露處墓旁不忍去土人憐之  
為構廬舍事聞 旌表

葉君實江都人性伉直好施與嘗出數千金修捍  
海堤四十餘里

俞士瑄字宣玉江都歲貢生至性過人事父母自  
生養至喪葬皆盡禮盡情 康熙四十三年

旌表

高成琦字軼韓江都諸生父以罪流三原母抱病  
不起成琦每歲徒步三千里省父歸又負米養母  
一日父潛歸復還流所成琦侍行途中無貲驢費  
負父以行足裂流血歸未久父歿成琦晝夜哀號  
抱父木主投義濟橋下死

汪源澍江都人性至孝父年六十餘病弗治澍禱  
呂公祠手疏請代父跪塔下哭不起歸視父疾不  
瘳明日再詣祠哭凡七日不食夜坐父牀側假寐  
夢道人長髯揮麈語曰汝父生矣驚覺父已呼粥  
明晨即起步見者喜愕不知其故澍終不言澍隨  
以疾死死之夕曰吾父生吾長笑入地矣

張中達字九達江都歲貢生幼孤母好潔躬為滌拭  
踰器生二子後即不復入室冬夜卧母足母或遣

之愀然曰母氣衰非兒不煖母病篤嘗糞以希其  
愈子庸德戊午副榜亦以孝友稱哭父病日哭母  
目加昏再哭弟遂失明

許明賢揚州人性至孝侍親意少不豫立寢門外  
累夕不就枕長子承宗善承親意友愛兩弟承宣  
承家凡發粟施絮設藥局置義塚倡育嬰社義事  
靡所不為

程願學字莫若儀徵諸生祖死於法父徙寧古塔

顧學以幼免成童後思親恒日夜泣不交一人屏  
除酒肉食未嘗飽冬月不衣綿纊蓋終身以喪禮  
自處臨終戒其子勿與妻合葬以不知其父骸骨  
所在也里中稱之曰苦行先生

劉啓元高郵人以孝行 旌表

李澧字方同興化廩生素性孝友父病扶持左右  
手劑藥餌雖盛夏鼎鑪火常在側閱七八年不  
懈居父憂斷酒肉終喪喪母亦然

徐文瑄字廷璧興化貢生早喪父母歲時祭祀終身作孺子泣會大水移葬親柩於高原躬自負土勞憊嘔血而死

方立禮字武城江都人八歲母亡繼母汪待之虐立禮受杖惟謹父卒汪益逞立禮益孝謹且推愛繼母所出之兩弟後母與弟相繼歿立禮殯葬之從厚 雍正六年 旌表

耿兆紳字賢書江都諸生性倜儻好施置義田以

瞻宗族設義渡以濟往來又多募瘞枯骨歲凶每  
出粟賑饑好學工詩古文所著有藜光集

李朱露字天膏興化庠生父漢病衣不解帶不入  
私室父歿廬墓三年事繼母孝年七十餘病革猶  
泣持繼母手以不能終事為憾

程銓江都人樂善好施順治壬辰大水被災民千  
百為羣有挾借倡亂之勢銓以利害曉勸商家巨  
室斂貲散給諭歸復業揚賴以安子濬康熙丙辰



進士知大名府以寬和治

趙宗普林中譽李之瑀閩士彥蕭日璜皆江都人  
邱雯高郵人俱割股療親疾

郭光字子瞻江都歲貢生父梁以醫濟人光性孝  
友親歿五十餘年每思慕輒出涕兄子遭亂相失  
傾囊贖歸愛養如已子師友之無後者春秋為位  
祀之

房毓麒寶應人事繼母以孝聞隣人與爭屋基即

拆屋讓之賊入室戒家人毋以火照給米鈔令潛  
逸縣令廉其行義命乘已興昇行街市以旌異之  
王紘興化諸生與弟纘俱割股廬墓

耿兆組字玉書江都縣學生有貨殖才承先業以  
節儉致贏餘嘗輸米代貧家償逋糧捐田助獄囚  
食置義渡船於鈔關運河建普濟堂於瓜洲地施  
樁瘞皆哺饑絮凍事無算

徐熹字映如興化貢生廷試畢以親老不謁選歸

父病顛天願減已冀以益父壽父卒廬墓三年及  
母歿晨夕悲號忽忽若母在每飯必覓母一日拊  
棺長號曰百日內兒當從母於地下矣已而果歿  
史以遇字際亨江都人順治戊子舉人負幹略究  
心時務江都里役積欠責成里長以遇言於有司  
改為輸納民便之子爽丁酉舉人著淮揚治水圖  
說淮水決周橋鳳泗民委卸弗塞爽獨身任其事  
除六安學正未赴卒

戴思訥字理研江都人康熙丙戌進士授編修少  
失恃侍父夢齡自就學至服官未嘗離膝下父官  
奉天府尹卒思訥悲傷直欲死而見父於地下扶  
櫬歸營葬畢復時欲自屏家人防之密忽買舟南  
下謝諸弔者行至平望於中夜自縊舟中康熙五  
十六年督撫准縣詳建專祠

徐州府

漢劉平初名曠字公子彭城人嘗為菑丘長政教大

行更始時天下大亂平弟仲為賊所殺平棄已子  
抱仲女與母匿澤中朝出求食逢餓賊將烹之平  
叩頭求歸食母畢還就烹賊哀而遣之平還既食  
母還詣賊衆以為烈士不忍食於是得全建武初  
為彭城郡吏郡守孫萌為賊執平冒刃蔽萌身被  
十創賊曰義士也遂解去後舉孝廉歷丞長顯宗  
時以鍾離意薦徵授議郎遷侍中宗正

劉均沛國人建初時為左馮翊會清河孝王母宋

貴人死不以罪朝野憐之實后復捕繫其父均同  
山陽張峻奔走解釋義聲者聞

劉愷字伯豫彭城人杼秋侯般長子以爵讓弟憲  
遁去有司請絕愷國肅宗美其義特優假之侍中  
賈逵言有司不原樂善之心而繩以法非所以長  
克讓之風乃徵愷為侍中官至司徒太尉

姜肱字伯淮沛人與二弟仲海季江友愛天至常  
共卧起嘗與季江夜遇盜欲殺之兄弟爭死賊遂

兩釋焉後與徐穉等俱徵不至桓帝使畫工圖其  
形狀肱以被掩面竟不得見後又徵為太守遂遁  
海濱

三國劉陽沛人初以漢室漸衰知曹操有雄才終為  
漢累欲除之而事不會年三十卒及操貴求其嗣  
子甚急賴東海王朗匿之又為開解久乃釋

南北朝宋孫棘彭城人宋孝武五年癸三五丁棘弟  
薩違期當死棘詣郡自列已為家督當坐薩又辭

列自引棘妻許又寄語棘不可委罪小郎且大家  
以小郎屬君家道未立君已有二兒復何恨太守  
張岱表上孝武詔特原罪賜帛二十疋

齊劉悛字士操彭城人仕齊為刺史父勔戰死悛時  
有疾扶服求得父屍頂後傷缺悛拔髮補之持喪  
墓側冬月不衣絮以父死朱雀航終身不由其路  
明帝崩衛送山陵路經朱雀航感痛至曲阿而卒  
梁劉覽字孝智彭城人丁所生母憂廬於墓再期不



嘗鹽酪食麥粥冬著單布衣家人慮不勝喪中夜  
竊置炭牀下覺因煖得寐及知之慟嘔血梁武帝  
聞其有至性數省視之

劉苞字孝嘗彭城人四歲而孤至六七歲伯父悛  
繪並顯貴苞見之輒泣其母怒之苞曰早孤不識  
父聞諸父多與父類故心中悲耳因獻款母亦悲  
慟奉其母常為扇席溫枕

劉曇淨字元光彭城人祖元直父慧鏡元直為淮

南太守得罪慧鏡請朝乞哀愷惻以孝聞雲淨篤  
行有父風為安成王左常侍父卒奔喪不食飲者  
累日絕而又蘇每哭輒嘔血詔舉孝行用為海寧  
令讓之兄乃除安西行參軍事母尤淳至身營殮  
粥不以委人母亡天甚寒身衣單布廬於瘞所晝  
夜哭臨不絕聲哀感行路未暮而卒

垣曇深下邳人以行義稱為臨城縣罷歸得錢十  
萬以買宅奉兄退無私蓄歷羽林監王儉深重其

學行

隋劉士雋彭城人丁母喪絕而復蘇勺飲不入口者  
七日負土成墳結廬墓側虎狼馴擾為之取食文

帝表其門

唐劉審禮彭城人德威子少喪母為祖母所養隋末  
大亂審禮負祖母渡江轉側避地祖母病必煮藥  
嘗而進藥父徒跣血流事繼母尤謹再從皆同居  
合二百口內外無間言後殉吐蕃之難贈工部尚

書諡曰僖子易從

劉易從父審禮為左衛大將軍儀鳳三年討吐蕃  
戰敗見執子弟皆請闕待罪請入賊以贖有詔審  
禮殉忠以沒非有罪宜各還職特詔易從往省之  
既至而父歿易從晝夜哭不止吐蕃哀而還其尸  
官彭城長史永昌中為酷吏周興誣構將刑百姓  
爭解衣投地曰為長史祈福當時號孝義劉家  
皇甫恒尹務榮俱彭城人咸數世同居事親居喪

著至行天子間其孝弟旌表其門

甄佚徐州人明經教授鄉里稱善人家貧乞貸以  
葬父母作室墓傍陳后山名之曰思亭而為之記  
朱全昱碭人全忠兄全忠將受禪全昱曰朱三爾  
碭山一百姓遭逢天子用汝為四鎮節度使於汝  
何負而滅唐家三百年社稷吾將見汝赤族矣遂  
辭歸居碭山故里

宋彭程徐州人四世同居詔旌表

李柞豐人親喪廬墓凡二十七年

金劉全彭城人天興間率鄉人避兵沫溝北兵至盡  
俘其老幼全父亦在俘中遣信招全全縛其人送  
徐州因竊父以歸徐帥益都嘉其忠承制以為招  
信校尉

元劉福蕭人孝養有聞居喪苦塊飭粥悉與禮合

韋信碭山人每朝夕供親膳必俯伏四拜而後退  
人問之答曰父母恩終身難報跪拜何勞有司以

聞至元間詔旌其門

史彥斌下邳人有孝行至正中河溢墳墓多壞彥斌刻識其母棺而後葬明年墓為水所漂失母棺所在乃縛草為人浮水中仰天呼曰願天矜憐假此芻靈指示所在隨草人所之竟得柩改葬

杜佑邳州人河南行省署為三义水馬站提領父病於家佑忽心驚舉體沾汗棄職歸父病始三日遂禱神求代嘗糞以驗疾父卒廬墓盡哀有馴兔

之瑞

胡居仁 張允中俱徐州人以居喪廬墓旌

匡國政唯寧人為歸德判官母病刲肝以進又病  
剔腦和藥病即愈母沒廬墓三年有鹿馴遊其旁  
郡邑上其事表其里曰貞孝

吳希曾睢寧人葬父之日大雨希曾跪柩前炷艾  
燃腕火熾而雨止既葬廬墓被旌

郭通徐州人少以孝稱父柩在殯鄰火延及通舍



通仰天訴曰柩不能移寧與柩俱焚死伏柩痛哭  
火須臾息

明李英邳州人母劉病甚英嘗糞視藥而愈母亡廬  
墓三年洪武中旌表

張義邳州人洪武初為大塚以瘞境內骸骨暴露  
者

朱環字璇玉徐州人由國子生授靖寧州知州有  
孝行母歿廬墓上聞旌表

權謹字仲常徐州人十歲喪父哀毀過成人兄度  
為壽陽丞坐事謫戍謹罄資給其行妹寡則撫其  
孤成立永樂時薦為光祿署丞仁宗時母終躬負  
土封樹廬墓三年有泉湧免馴之異事聞召拜文  
華殿學士以風勵天下尋改通政司叅議子倫字  
民哀永樂丁酉舉於鄉學行修明養親二十年不  
仕倫子宇亦盡孝倫年九十病卧宇侍湯藥寢不  
解帶既卒廬墓哀泣母卒亦如之詔旌其門

張端字端夫徐州人親喪廬墓以孝行薦授真定太守

范寅字敬時徐州人仕河間府同知居喪廬墓

王僧兒徐州人母病篤僧兒剖腹取肝入糜食母病  
尋愈洪武中旌表

閻馬兒徐州人洪武中以匠執役京師聞父病篤  
弗得歸省剖腹取肝焚香籲天祈父病瘳事聞復  
其役旌其門

岑義邳州人事父母朝夕問安必拜跪母盲朝夕餬之

目復明父母卒廬墓三年甘露降墓木半月詔旌之  
王豫字德立徐州人居二親喪哀毀骨立葬遇雷雨  
號泣額天雨尋止廬墓三年羣鵲馴集奏旌其門  
周湘字東之徐州人精易理後學多師之性至孝  
悅親極滋味母亡侍父寢食十有一年不入私室  
邵良卿碭山庠生父早卒事母甚謹母病嘗糞以  
驗劇差及卒廬墓三年

王克明沛人景泰初任湖廣沅陵縣巡檢時泰襄

毅公紘以御史降為其邑丞秦時意有所不可克  
明為規教之秦後漕運巡撫每過沛必親祭其墓  
甄鑑 周防 李卓 王原 蔣榮 張麟 馬  
士雲 黃成 龔成 黃智 卓旺 周成 俱  
沛人正統五年各出麥千石賑濟饑民奉勅立坊  
旌異其家

沈彥禮 趙翥 周彥民 俱邳州人正統中歲  
大祲各納粟千石以賑饑民奉勅旌獎

蘇德邳州人母張寡居患癰疾歷二十年德及妻奉事惟謹不離左右母卒哀毀廬墓三年

劉瑛邳州人與妻張氏俱有孝行父母歿前後廬墓六年

張文友徐州衛軍金黃國子生張暎郡庠生吳友直路車皆州人五人並以孝行上聞成化中旌表蔡清沛人成化中以孝旌

羅鵬字雲漢宿遷人成化丙戌進士授御史以祖

及父母迎養道遠乞改南道後為江西僉事一夕  
夢祖病即遣使持衾具歸祖果屬纊遂用之人稱  
其孝感

葉斌邳州人成化中大疫死者枕藉斌捐地為義  
阡瘞之

南傑蕭人弘治時以孝旌

唐鸞蕭人親喪廬墓弘治年旌表

丁友邳州人弘治中以孝旌

高大茂邳州人少時母石氏病盲大茂問其故母言產汝時為風所傷大茂日以舌舐之竟得復明母病剗股以進疾遂愈

馬尚用徐州人幼孤奉母至孝母沒廬墓朝夕泣奠正德中流賊掠境猶守墓不去鄉鄰強之乃歸楊輔徐州人廬墓被旌

周正徐州人家酷貧目不知書以力養親親歿賣身以葬新安義高捐貲贖之正必竟役而後去郡



守張植為墓碑旌其行

張鵬宿遷人祖母與父母沒各廬墓終喪子璣亦有孝行

張賓賓弟崙宿遷人自元時始祖張榮至賓同居十四世男女二百餘人衣食必均嫁娶祭祀宴飲喪葬定為約束事聞旌表義門

姚通宿遷人父母沒俱廬墓終喪事繼母盡孝

孫清睢寧庠生幼孤事母孝正德中母卒時流賊

入境清守母柩不去賊義之不入其門鄰里亦賴以不擾有司上其事立石表之

岑仲暉 高興 葉旺 高宗泰 鞏得海 俱

邳州人正德中以輸粟賑饑旌表有尚義坊

孫應奎蕭人力農奉母母病思食甜瓜時四月未實應奎奔號忽從野蔓獲之母食病愈

劉鑛蕭人甫十歲父疾對天泣禱人咸異之及長母病鑛夜祈北斗願以身代大風卒起燭終不滅

母亦尋愈後由太學生任徽府審理

蔣仕蕭人父母沒皆廬墓三年不歸有慶雲見山  
隅人共指為孝感後膺貢三任教職砥礪清修每  
曰吾求無忝所生而已

岳鍾靈蕭人父亡念母老不敢遠出廬於堂外設  
主朝夕哀奠三年不入私室

任逮蕭人父歿廬墓日致奠而泣聞者傷之御史  
毛復親造其廬服闋以選貢授樂亭丞

郭全 龔謙 趙安 皆沛人親沒廬墓

楊冕沛庠生母沒廬墓三年哀痛勿輟嘉靖中旌

表

趙清沛貢生父孜年十七嘗割股療親父死母卓  
貞居四十年教清以篤直剛方清純孝母亡廬墓  
墓瀕河大水且至清死守弗移俄而水溢弗汨廬  
傍有隙倉卒不暇塞夜有鼠啣草塞之槁瓜復榮  
秀聞者歎異

陳應詔 陳應貞 姜上桂 侯穎 俱沛縣庠  
生值白蓮寇亂義不苟免力鬪而死上桂父子俱  
死穎妻女先縊鄉黨尤憐之

楊東萊沛人年十四割股療母疾督學御史令補  
邑庠生月給米贍其母

石璞 張奉 李三陽 梅映春 張楫 皆沛  
人親亡廬墓

江漢 許九官 皆沛人割股療親

周潭字德隱豐邑諸生父母喪皆廬墓三年

張倫礪人以歲貢生任項城教諭僚友有夫婦偕  
卒無子遺二女遠弗克歸倫治棺營奠復捐資嫁  
其二女

張思敬徐州人事孀母備極孝養母沒廬墓三年  
友愛諸兄推誠讓產又嘗施義塚修月河橋凶年  
掩骼捐槥皆不憚勞費

孫榮字世華豐人性孝友家人化之同爨者五世

己丑歲遇大饑與邑人李楨各出粟千五十石以賑詔旌為義民同時邑人李鑄張祥胡祥孔僅翟成王舜舉李保周興甫侯宗錄秦儀各輸小麥千五十石賑饑同被詔旌獎

陳邦瑞豐人嘗置義田三百畝贍給宗族差賦皆自辦

孫操字雅持豐諸生父燦當歲饑家有麥三百石盡散給宗族遂貧乏操忼慷好施有父風明季盜

起戮力守陴以身殉又有張劍字又華亦豐學生  
同殉

張鎮邳州人萬曆中以孝旌

晁世興宿遷人萬曆四年修城助銀千兩事聞賜  
七品服

王知止睢寧人性慷慨剛正兄早世撫孤姪若已  
出孤又天事嫂如兄有夫貧欲鬻妻者遂捐粟麥  
助使完聚里人頌之



周宗輔唯寧人其先代歷七世未析居宗輔性友  
愛掌家務後益置田廬戒子孫世守家法鄉人服  
其義

王基貞字亨甫蕭人精騎射崇禎丙子城被圍基  
貞同兄弟分守南隅敵踰城上輒刃之次日風霾  
作城潰西北猶率衆巷戰衆寡不敵遇害

任如龍字霖蒼蕭人剛介自守丙子城陷將刃其  
父母如龍奮身捍衛呼曰寧殺我無害我八旬父

母兵士竟害如龍舍其父母督學倪以其事聞賜坊旌表併祀鄉賢時諸生與難者五十一人

郝惟聰字翼明蕭人流寇破蕭城負母匿於學東廡賊搜獲之乞以身代母賊憐其孝舍之去過他賊又被執挾至清水河度不能脫投水死焉

張鳳世沛人居夏鎮膂力過人流賊之亂結寨護其居民賊至與鬪所擊殺頗多終以無援為賊所

殺

張垣崇徐州人明季武舉居鄉謹厚好施嘗出家財賑饑置義田贍族保舉授歸德府通判明亡以身殉

孫枝芮字季長豐人事母孝當壬午城陷四兄皆遇害守母不去及被縛大慟曰殺我誰養吾母賊憐而釋之既得脫盡撫諸兄遺孤

國朝李從任徐州諸生讓產長兄以教授自給復為兄婚其二子其弟夫婦死於盜覓屍合葬成禮撫其

女嫁之明末羣盜劫入神廟中僧識之語盜姓名呼為義士得釋瀕行見所掠婦女十百聚他室好語盜曰此皆良家女吾罄家資可得三百金向汝贖之可乎盜曰可歸挾金去如言盡散遣之有江右友人家燬於火不能自存從任迎其眷屬至徐經紀其生業子藻孫宗靖並有至行

程一順徐州人性尚義好施予歲饑捐資設粥借妻孟氏親視炊爨費監司府州咸表其門

徐文魁徐州人以任郵著稱值郡饑疫捐貲施粥  
藥棉衣存活萬計其死亡者施棺埋骨善事尤多

巡撫 題請 旌表

郭如徐州人父母死於流寇如年八歲依姙戚以  
長刻木主朝夕奉事言及父母輒悲號過歲時流  
涕終日至九十不改年近百歲終

朱鑲蕭諸生家貧博學事父母以孝聞明末遭寇  
亂冒死救親避難彭城夜讀書晝樵汲以供薪水

父母病專治醫遂精其道每煎藥必親嘗焚香露

禱親疾遂愈 順治十五年 旌表

楊枝榮徐州人幼失父即哀毀如成人母欲殉父

死枝榮泣涕防護家酷貧減衣食以養母母終哀

毀骨立典鬻以葬 順治十七年 旌表

仝剋唯寧人順治十年膠寇陷城衆各驚避剋祖

母邱氏年八十餘剋與妻張氏扶掖而行賊突至

將殺邱剋夫婦環抱以身捍刃賊怒殺邱并及剋

張氏亦投井死

張賁徐州庠生事孀母孝聞於鄉順治十七年

旌表

李三禮徐州人七歲親不豫叩天稽首至愈乃止  
長以例授廣東經歷不赴親強之行謬以他故返  
父病呼天求代既不起廬墓側淚漬土皆濕竟死  
於墓所

張瞻徐州人武舉官至都督同知會推總兵樂善

好施捐金倡建學宮造荆山口長橋數里以便行旅

張之麟徐州人武舉官至威寧鎮總兵徐東鄉數  
罹河患麟出麥數千石濬溝洩水又疏房亭河倡  
築花山口河堤汙田遂成沃壤徐邳之人植碑銘  
德

谷應麟徐州人年十一喪父家貧學雜髮養後母  
四十餘年不懈婦死母年八十仍躬執爨母歿無



以殮鬻身鄰家鄰家感歎折券與歸因廬於墓側  
日培土三肩雖甚雨雪不輟數年墳高大若陵有  
司上其事與 旌典又李本延孝與應麟相類

韓永膺徐州人立義塾於暑蘭山村延師教其子  
弟歲於冬春之交煮粥濟饑人三月製棺貯古廟  
中聽喪者自取割田十五畝為義塚築橋城西南  
路以便行人上官旌曰善人

章得簡字簡臣蕭人早失恃事繼母以孝聞遇族

黨不能婚嫁殯奠咸資助之在都門鄉人資斧告  
匱卽解案以贈以歲貢任宿遷教諭修學數百金  
悉出已囊又蠲資設粥賑饑躬往監視莅任五載  
卒於官祀名宦

周士珠字味元沛人育德子為諸生性高潔不履  
市井遇鄉子弟必極恭謹與言皆孝弟忠信鄰里  
雀鼠嘗造廬求平士珠輒為解婚喪不能舉者質  
典周郵晚年寄情詩詞有南村漫詠

王嘉重沛監生家不甚富而行力任卹壬寅春山東饑人流寓境內者凡數百家無以自存與兄嘉訓出粟計口賑之未幾粟盡來者益衆至萬餘人乃鬻其田宅買粟以給計日費四百餘金未幾金又盡而流者尚不能歸其弟嘉猷復傾家繼之比饑人去兄弟遂大窘乏卒無悔也

史應甲豐諸生樂善好施每具藥餌棺木粥糜衣被以濟貧窮無告者有姊貧寡不能自給應甲迎

養於家婚其子女有從兄弟分產未均應甲出地  
助而和之

太倉州

宋王子昭嘉定人篤學好禮嘉定間始創學宮首捐  
已田以贍學者士嘉其義

李重發崇明人性至孝母死廬墓註孝經行世

元陳真孫崇明人延祐六年謁選京師舟次東昌聞  
新店河溢溺三四百家真孫傾囊買舟救援仍市

米作糜以食之全活二千餘人

秦玉字德卿太倉人少孤母顧力織紵給朝夕玉  
刻志苦學博通諸經與兄終身不異財母病累旬  
不解帶及卒泣血茹淡者終其喪俄鄰失火母殞  
在堂玉憑棺號慟火遽滅

陳寶生字彥廡太倉人父溺海死母莊撫育成名  
與黃公望善以父溺終身不至海上公望歲一詣  
必至海觀濤邀寶生往則泣曰陽侯吾父讐恨不

能如精衛填木石何忍對之公望因作仇海賦紀其事

明陸安太倉人洪武初父德甫以所館客事連坐當棄市安求代父刑伏闕哀請許之臨刑從容就刃觀者泣下同時陳元吉亦代父受刑

薛鉉字彥文崇明人鯁直好義永樂二年水啗圩岸民不能築鉉傾廩濟之人皆賴焉

俞敬太倉人常剝肝愈母疾永樂間詔旌其門

沈輔字良弼嘉定人性至孝常他出忽心悸曰得無二親不安乎遽馳歸則母已癯潰不治矣哭踊絕粒者三日父病末疾輔與妻翟氏朝夕稽顙額天願減已筭以益父壽久之額成窪父歿廬墓終身弘治七年旌門雙孝

沈瑄字君玉嘉定人母病目瑄以舌舐之三年復明父有瘖疾偃僂不能起立瑄日夜扶侍間有李神針者能起錮疾邀致之李欲為灼艾瑄先以身

試痛甚恐父不勝固請勿灸是夜父夢神語曰感  
孝子意為汝鍼之鍼下驚汗而愈弘治九年旌門  
瞿通甫太倉人兄弟五世同居知州李端奏旌其  
門

施美玉字邦珍崇明人以歲貢為膠州判官親喪  
廬墓惟展孝經不尚浮屠法有二友以財構隙密  
為代償兩不使知又貧民有鬻男還逋者令贖男  
歸不責其直素慕靖節自號半陶



王瑄太倉人母卒結廬墓側風雨不移晝有故出  
夕還必跪墓前曰瑄來矣慈烏時集其廬人以為  
孝感所致

王在復太倉人嘉靖甲寅倭亂掖父逃途次相失  
在復既免復返尋父見父被執即趨叩乞命倭持  
刀殺父在復以身蔽之父子首並墮手猶抱不可  
解

徐一元嘉定人交河縣主簿與嚴文靖訥善時江

南被倭歲復大稔計惟免漕可以濟之乃代訥草  
一疏焚香祝天會奏上竟得俞旨東南之民賴再  
生焉孫應聘以進士仕至太僕少卿亦以篤厚世  
其家

傅遜字元凱嘉定歲貢以節義自負善論古今成  
敗師事崑山歸有光倭寇崑山請絕城出詣軍府  
告急得兵以解圍人皆壯其義所著有春秋左傳  
屬事本末

沈志仁字景範太倉人父尚友為松潘總兵播酋  
亂坐逗留逮獄論斬志仁跣足隨行號泣長安街  
遇寇蓋輒叩頭訴會秋盡且論報志仁詣廷尉乞  
上父寃狀廷尉辭乃叩閣自拜疏時帝尚恭已上  
書多不報志仁疏上二日忽有旨釋尚友志仁奉  
之以歸

沈兆字祥卿嘉定人母病割股嘗糞及亡哀痛不  
能起在南雍時甥龔錫爵方五歲遭家變僕李崧

負至兆所兆撫之如子及成立乃出其十五年餘租與親友所贈一箱并付之

李崧嘉定龔錫爵乳媪之夫也錫爵僅五歲而父為家奴所賊有欲殺兒分其產者崧夜負以逃走雪中五日依兒外家沈氏朝夕護之後錫爵成進士官至方伯而崧短衣力作如窮時崧死無子錫爵命子孫世祀之

王世芳字尚義太倉人嘗訪舊小直沽時慈溪費

廷槐病滯旅舍世芳一見吳之移至寓中調護甚  
謹明年同舟南下病又發便溺狼籍世芳躬為滌  
除行次呂城費卒世芳稱貸營棺衾歛之且遣人  
告其父父至舉其柩弗前遲明世芳絮酒未哭柩  
即舉旁觀莫不歎息

丘集字子成嘉定人家貧讀書長於三禮之學當  
倭亂與寡姊共埋金於地集為倭獲被脅出已所  
埋與之姊物無恙兄子坐逋賦當戍集罄資竭力

營救得免

嚴銑嘉定人父為堂邑令因權賦勘田秉公不徇情為里豪所中以非法死銑尚少自刻其胸作必報父仇四字累歲訟寃於官不得伸遂自經殷都為作孝子傳

錢春沂字仲與嘉定人為諸生時父被寃繫沂慷慨陳情出父於死獄中後以舉人任德化令植吏以羨餘進沂曰此百姓膏血也却不受尋乞歸優

游詩酒者二十年乃卒

殷子義字集卿嘉定人其學根極理要授經里中  
垂四十年以遺產讓其異母弟而脩脯所入復分  
給之為淮安訓導貧不能治裝門人各奉金為贖  
三年罷歸病亟猶計所受封識以屬其家俟來弔  
則還之其嚴於取子如此

徐任字惟用太倉人嘗割股療母疾得愈

侯萬鍾嘉定舉人父病篤萬鍾顧天求代時六月

上旬忽有橘自空而墜鮮潤如新父食之病遂愈  
人皆異焉

陸相字忠誠崇明人父以事致獄相冒死白寃代  
苔幾斃母疽發割肉補患處立愈與弟臣共費七  
十餘載有義門之風

李繩之字受伯嘉定人父歿廬墓三年先是父給  
諫先芳已入鄉賢祠後見從祀日濫嘆曰吾父豈  
與若輩伍抱主而出平生剛直方嚴義形於色東



林諸正人皆推之

蘇時麟字泰醇嘉定人嘗以千金之產悉讓二季  
有故人盜其室中物後復至子弟弗禮之切誡曰  
彼為貧故何得傷親誼也明季徭役甚重不令其  
子赴公門曰秀才一入公門則氣卑而顏厚矣

張錫眉嘉定人明季鄉薦嘗却旅館奔婦歲凶瘞  
道殣千人故人葉生無子為葬其兩世國變自經  
妾何抱女沈水死

張鳳儀字恒拙嘉定人父母繼喪朝夕哭遂致失明夢神療之立愈有鄰人遠遊寄金二十兩後遇凶歲鳳儀饑且死囑其妻曰吾若先汝死當埋金土中以俟其歸勿動分毫也父歿後事兄如父年踰六十每事稟命兄亡慟哭一月而卒

國朝呂雲奇字石英太倉州人鼎革時偕父匿叢棘中避兵父已被執雲奇即躍出抱持其兵乞免皆被殺死猶兩手抱父項不釋斂時妻龔氏截指置棺

中以自矢事定知州白登明旌其閭

江德璜字獻之太倉人母目瞽日以舌舐冀其復  
明母病痢中裙廁踰躬自浣滌乙酉七月德璜避  
亂遇兵其子抱父求免遂同被害時稱兩孝子

侯汭字記原岐曾子也九歲聞祖父論紅丸事輒  
曰楊漣既與方從哲同被召當進丸時何不面爭  
顧從衆出乎聞者皆異之嘉定折漕已久明季有  
暫輸五萬石之令汭以諸生詣闕上疏得免會峒

曾以不屈死有司名捕其子滂泣慮世父無後乃  
遍書滂姓名於衣襟投水代之以救得不死

封昞字韜若嘉定人幼喪母業醫竭力以供甘旨  
父忘其貧 順治十七年 旌表

倪珩嘉定人年十四母目失明舌舐半載而愈順  
治二年父為亂兵所執珩乞釋不允延頸求代兵  
感其孝遂得俱釋 雍正元年 旌表

周士晉字康侯嘉定人母久病傾家療之貲盡未

愈醫言惟得人乳可再生士晉謀諸婦李氏即棄  
其九月兒以乳乳姑三月而母霍然起越十二年  
有僧為殷氏子推命怪其年月與周氏兒同詰之  
則得諸道傍者也由是兩家通往來未幾殷氏家  
落令之歸宗父子復合徐枋為作全孝傳

沈印璵字仲玉崇明人順治間崇為海寇張名振  
所困助餉五千兩事聞 旌額

王揆字端士太倉人時敏子性至孝事父不離左

右成進士後即歸侍養終身劉家河為崑太嘉三  
邑水利所闕淤久成陸揆上書藩撫疏浚建牖民  
皆賴之所著有芝廬集

郁聖揆字紹虞太倉人父患目舌舐而愈母歿廬  
墓三年巡撫湯斌奏 旌其閭曰純孝性成

錢陸字臣康太倉人嘗置義田三百畝以贍宗族  
又為廣孝阡以待親族之貧不能葬者康熙十八  
九年邑大饑陸傾貲煮粥賑之民賴以全

黃安邦字先誠崇明人康熙三十五年潮災設廠賑粥并建丁家橋三江口橋以便行人雍正元年

奉

旨准授八品冠帶

黃信中鎮洋人六歲時晨昏定省儼若成人里中稱小黃孝子父病溺閉危甚信中焚香禱天夜若聞人語曰吮之則利矣信中即吮之果通吮半載而愈父歿廬墓三年雍正八年建坊 旌表

唐亮采嘉定人 雍正十一年 旌表

海州

元王士寧贛榆人事父盡孝貧不自給而甘旨不缺  
至順間旌表其門

明劉煥贛榆人與弟炯皆孝謹父母卒兄弟俱廬墓  
三年友愛甚篤縣令表其門名所居曰孝義莊

葛貞沐陽人輸貲助官賑濟正統時旌

支儉沐陽人父母歿廬墓終喪成化中旌表



徐謚海州人官府軍右衛經歷父母歿廬墓終喪  
有白鹿之瑞弘治中旌表

吳玘沭陽人少孤母病嘗糞疾愈母卒廬墓終喪  
沈麒沭陽人正德中流賊犯淮郡麒守母病不去  
郡守被執麒趨入賊壘諭以禍福賊義而歸之

劉守良字君遂贛榆人正德辛巳進士歷工部郎  
性峭直孝友為諸生時母病思鮮菌不可得守良  
叩天悲號竟夕據木樁倦而假寐既覺有菌生於

木為羹以進母病遂愈

管名贛榆人平生不入城市事親至孝父母沒廬墓六年負土成墳手植松樹萬餘株

劉梓贛榆人父母亡廬墓四載歲饑剖木皮自給不離墓舍人咸稱其孝

閻大祥字應和贛榆人嘉靖乙酉舉人端方嚴毅為諸生試金陵同舍生死大祥傾囊以斂歸櫬於其家通判嘉興以廉忠著

通州

宋巖希孟如臯人母病瘡希孟割股肉和糜以進遂瘳居憂三年未嘗與人言笑

史聲如臯人元祐進士家貧母先卒躬樵採以養父及受官迎養中途父歿扶柩還葬結廬墓左負土培壟遇吊者不交言惟搏頰告哀而已

丁天錫如臯人父早卒事母至謹一日盜入脇其母索財無所得欲殺母天錫以身衛曰寧殺我寇

亦慚母子俱得免

顧忻泰興人母病不如葷者十載早起率妻子詣  
母室問所欲五十年如一日母老目不能睹物忻  
日夜籲天母目復明

元蔡夢祥泰興人事母至孝四世同居明天啓旌其  
門

明王鳳通州人割股啖母疾遂愈

劉勳通州人祖疾勳割股為粥療之踰歲祖卒勳

每哭絕而復蘇居喪三年不茹葷不入寢室

張黠字元素泰興人幼從父城宦京師長歸娶至揚夢父病驚悸不食亟返舟至則父已卒扶櫬還途遇盜見其哀毀骨立不忍犯而去母棺在殯鄰家失火黠伏棺痛哭願與俱焚火遽息歲饑傾橐以賑鄰人穴墻盜穀黠覺之令滿負而去竟不言其人事聞旌表

姚山如皋人父病草山十二歲割股

白承宗字厚之通州人八歲喪母哀號不食父病  
替三十年嘗以舌舐其目父八十時承宗置酒上  
壽親目忽開親歿廬墓

許綦泰興人家貧年十六母黃氏病且殆兄將驚  
綦治棺殮母不忍綦告天割右乳下肉以進母遂  
愈

姜岱字南村如臯人愷直能任事嘉靖二十九年  
以興化糧重如臯糧輕欲攤均之岱與好義者十

人取臯土與興化土各負一囊走控巡方御史請  
稱量之曰土瘠則輕土肥則重相土輕重定賦多  
寡法創自太祖奈何一旦易之況今日興化糧重  
可加如臯設他邑賦重獨不可加興化乎事乃中  
寢

夏暘字國輝通州石工目不知書而志行純篤每  
日盱必設酒醪引諸孫戲親側親或拂意即與妻  
朱氏跪謝候改容乃退母卒父年老獨處暘不遠

出夜不入私室寢輒抱父足冬月則溫其溺斃於  
懷如是十餘年年九十四卒度奉二親神主事必  
啓而後行遇疾風暴雨便行視墓所攀樹泣然當  
父在日暘之子嘗以小忿為其弟毆至斃暘惡傷  
父志但含涕不言御史劉存德按部聞暘名召見  
歎嗟自以官遊違養久執暘手對之流涕命製衣  
一襲親衣之其卒也督學御史黃弘毗下州為立  
祠表焉



殷國竊通州人桂陽判尚聲之子以父命往武昌  
途中聞桂陽兵變急返則城陷而父已遇害國竊  
治喪事已將歸覲母告慰於父之靈痛哭而殞州  
人憐而葬之表曰殷孝子墓

國朝冒襄字辟疆如臯縣人為諸生有聲父起宗官荆  
樊時流寇充斥襄往省覲奉母以歸不入內寢或  
問之襄曰父在殘疆而子安枕席乎泣血上書政  
府得調寶慶襄友愛諸弟一日忽有人入戶將割

刃於襄裏子丹書以身蔽被重創聞於官辭連其弟襄痛哭直弟無是事太守因並寬刺者驚產賑饑日行道殣中染病死三日復甦著樸巢水繪集以隱逸薦以博學宏辭薦皆不就

李我彭通州人乙酉四月郡城破負病母逃至水側兵及之母驚殞彭伏水草中俟兵過負母屍走數里掩埋畢再拜一慟而絕

范育如臯人偕諸昆季置田七百餘畝以歲入給

族之貧困者康熙戊申年倡買田十七頃為育嬰  
永遠之費施棺前後共千餘

徐弘成字自西通州貢生友愛前母兄撫孤姪如  
已子母亡慟絕十有三日亦歿 雍正七年

旌表

陳維坤字一寧通州人母病篤坤破指血書表禱  
東嶽廟求以身代踰年自城買藥至家仰天語曰  
帝准召我母可延壽矣言畢而死母病果愈聘周

氏未娶欲歸陳守喪未果已而聞有行媒遂自縊  
李黃字友芝通州庠生昆弟五人其幼庶出父命  
析產為五簿黃減其一父疑其屏庶弟也怒之黃  
跪請曰兒頗能自給願以均分諸弟父大悅後弟  
姪家俱落黃為經紀其婚嫁里中義事倡而行之  
孫莊通州人 許石陞如臯人俱割股療親

朱國靖新安人家於泰興厚樸好施順治辛卯壬  
辰歲再饑皆出資賑濟每歲暮資寒士以膏火又

捐金甃橋梁埋齒骼新梵宇為善孳孳不倦



江南道志卷一百五十九

欽定四庫全書

史部

江南通志卷一百六十

詳校官給事中臣丁雲錦

檢討臣德生覆勘

總校官編修臣王燕緒

校對官助教臣卜維吉

謄錄監生臣陸潮愈

欽定四庫全書

江南通志卷一百六十

人物志

孝義

四

安徽三府

安慶府

晉何叔度廬江潯人恭謹有行業母早卒奉劉氏孀  
若所主官至太常卿子尚之

何琦字萬倫司空充之從子父卒琦年十四哀毀



過禮事母純孝孜孜色養及母喪方殯在堂適鄰家火琦撫棺號哭俄而風止火息

南北朝宋何子平廬江潯人令海虞得祿惟以供母不及妻孥母喪去官哀毀踰禮大明末東土饑荒繼以師旅八年不得營葬晝夜號哭常如袒括之日冬不衣絮夏不就清涼一日以數合米為粥不進鹽菜所居敗屋不蔽風日兄子伯興欲為葺理子平不肯曰我情事未申天地一罪人耳屋何宜

覆其敦厲名行如此

梁何炯字士光廬江蕩人炯年十五從兄允受業一期並通五經章句為永康令以和理稱遷治書侍御史以父疾經旬衣不解帶頭不櫛沐信宿之間形貌頓改及父卒號慟不絕聲竟以毀卒

唐徐仲源望江人事母至孝母疾割股為糜母食而愈貞元中邑宰以其孝上聞勅號所居鄉曰孝感母夙畏雷仲源必躬為掩耳既卒葬於宅之東南

陽每遇雷震輒伏墓曰仲源在斯郡邑又以間再命築孝義墩賜曰華軒以彰之

元周樞密潛山人逸其名至正間武進士紅巾賊寇境聚鄉勇屯馬園寨保障生靈十餘萬先後十五年屢破天完兵以功授樞密同知明高帝出師鄱陽借糧於周周助米千二百斛洪武時令守舊土有德於民民祀之

杜萬戶桐城人元將也偽漢兵陷安慶余闕既死

其妾甫生一子棄水濱杜見呼之曰此余叅政子  
義種也悉捐所攜物懷其子去今桐城洪濤山王  
氏即其裔家廟猶祀余叅政云

方德益元末自池口徙桐以好義稱所居隣學宮  
循隘割宅地之半以廣之桐溪水出龍眠暴漲則  
激石漂木不可渡議橋者難焉德益捐金造橋枕  
石堅緻迄嘉靖末猶賴之

明葛宣潛山人明太祖討陳友諒輸粟千餘石至郟

陽餉軍太祖義之

黃榮六桐城人時掛車河有吳貴自稱元帥性光  
暴貪財好殺榮六奮義為保障築六兒城於蔣家  
山遠近不能自存者皆來歸適明太祖下安慶榮  
六請降不受爵賞遂歸山

曹鏞懷寧人母龍氏病聞人肉能療疾割體肉以  
進疾愈復作又割胸肉以進未幾疾又作鏞妻王  
氏割臂肉以食母既而病大作鏞又割股母疾竟

廖洪武時以孝旌

楊貴安慶人母蔣氏病刲左股及脅肉以進母疾  
遂愈詔旌其門

汪思義潛山人喜施予正統戊午間江北旱潦頻  
仍思義輸穀賑之勅建旌義坊表其門

謝佑桐城人字廷佐正統間進士少孤貧事母至  
孝歷官山西右布政致仕歸臨卒母喪未終遺言  
衰絰為殮死不忘親也

檀郁字子復桐城人家貧少孤母汪守節奉事至孝母卒無以為葬或贈石山不可穴泣禱於神有鄉人夢神云檀孝子有穴曰湧泉可丈許耳或解之曰人湧泉穴屬足其山麓有穴乎求之果得窆遂廬墓側無水苦遠汲忽石罅出泉色瑩味甘三年郁歸泉遂涸正統時旌

魯希曾號兩山懷寧人與弟希周菽水侍母必歌詩以侑之母疾三年衣不解帶學使欲旌之希曾

泣辭曰此自生人恒事何忍以父母博名高哉學  
使降階而揖愈敬禮焉

阮以臨字象源懷寧人少有豪氣總督葉夢熊奇  
之征寧夏疏薦偕往以臨潛然流涕曰溫太真以  
一代人豪特急功名絕裾而出千古薄之吾奉菽  
水他不問也力辭不起母歿每除夕必墓宿

韓祥印字維熊再刲股療祖母及母疾

石檜字耕榮宿松人讀書明大義成化丙戌歲饑



與弟棠各輸粟五百石出賑事間賜七品冠服

吳本清懷寧人親疾籲天求代及歿哀毀骨立廬於墓側有湧泉產芝之異成化時旌

曹規字循理望江人成化間以明經為邠州判重義樂施嘗捐資礮石作櫺星門及兩圩牖歲凶設粥以活流殍具棺以掩胔骼鄉里深德之

殷溥字直菴宿松人父早世母以哭夫喪明溥事之極孝成化癸卯領鄉薦亟營祿養就教嘉興遷

國子監助教覃恩錫封勅中有母節子孝之褒母  
亡後遂不復出

許本忠與劉澄俱懷寧人弘治年旌

吳鯉字躍如懷寧人正德庚午鄉薦知蔚州時總  
兵官劉定之以呈誤論死人多稱寃鯉未謀面即  
入見督撫備陳輿論之公力為解救得未減踰年  
歸里劉遺以金拒不受

胡效才字用甫桐城人嘉靖乙丑進士少貧授徒

以養父事繼母盡孝儲贄築室東郭授仲弟築室  
南郭授季弟皆體父母意也江陰令以故交餽金  
帛不受僅受布二端歸以奉母晚登第卒於京邸  
猶致書兩弟以不及終母養為憾

國朝雍正五年 特旌

方鵬字其大懷寧人家貧繼母馬氏遇之恩薄鵬  
百計承順有女弟馬出也馬意欲鬻其居以嫁之  
母既卒鵬如其意治奩以遣父歿刻木像飲食必

祭會他出夢父有怒色立馳歸有家僮替其像號  
泣治之蓋誠孝所感登嘉靖間進士痛祿不逮親  
終身不敢自奉

呂映太湖人嘉靖時以孝旌

吳堂字德升桐城諸生父患脾痛堂手自抑搔數  
月不使人代至丙夜父命之退猶泣不忍離父病  
革屬堂曰汝母非汝不能盡菽水惟也將析產伯  
兄為政堂僅得瓦廬半間以奉母有圃在伯兄舍

後偵兄意欲之遂作券因族長遺之不受值歲祿  
有歸粟數十斛者堂縮口節食以其羨給諸從兄  
弟及比鄰之乏者後以子一介貴贈副使

龍涌字本一望江人家被火祖母方寤睡奔入烈  
燄中扶祖母起負之出父病危刲股以療尋愈嘉  
靖時詔旌其門曰慈順

方岱字明鎮望江人孝友端慤嘉靖中歲薦當選  
以母年九十七終養不仕詔授官以旌之

方可字于時桐城人力學養志其伯仲皆異母父  
又獨愛可伯仲俱恚之可怡聲柔色不敢仰視父  
歿伯仲爭其貲訟之官可曰兄弟無訟詞不訴鞠  
不辨有司察而直之嘗置義倉輸穀以濟貧者

張祝桐城人年十歲割股療母

彭寶字惟善性孝友伯母癸常書助之居父喪哀  
思廢寢食竟以是卒

陳所聞字辛華桐城諸生少孤奉孀母獨任勞苦

得其歡心手一編督耕隴上就土性而權衡之所  
獲常倍次第為弟妹營婚嫁又各畀田一頃邑令陳  
贊化式其廬舉鄉飲賓

周聘字廷聘桐城諸生父母繼亡家貧十年不能  
葬坐卧苦塊終日哀號如袒括時知縣李尚默捐  
俸命諸生往營葬聘曰為人子而以親喪煩長吏  
其何能安守塚凡十二年遂能知來言休咎頗驗  
或問不習占候術何由知曰靜久不覺乃爾

陳邦符潛山人襁褓失怙母萬氏年二十守節至  
邦符數歲誠之曰兒能勉讀父書庶不負母忍死  
意也符聞感泣就塾師出入必稟母命父遺產二  
十畝推讓於叔父教授生徒支月俸為母養母卒  
廬墓哀毀以恩選歷三縣學博遷潞府審理致仕  
汪昌應字爾麟潛山人邑有鬻妻償逋者為贖還  
濱河大水漂蕩男婦棲木杪適昌應舟載稻百石  
過忽聞哀號傾橈載之以歸



方之綱字振宇桐城人少與弟之紀以篤學見稱萬曆丙子舉於鄉授雲南曲靖府推官之紀因兄入仕慨然曰兄出則弟當處課農桑以成兄為庶吏耳之綱在任亦念弟不置投簪徑歸兄弟聚處終身時論高之

李之讓字太初太湖人父早逝母劉苦節教誨後得祿而母死終身不衣帛甘食以母在時貧故也司教桃源值歲旱士多饑死有司猶嚴督逋賦乃

號泣請免不聽遂棄職歸

張思誼桐城人八歲父卒事母極孝夏驅蟲冬炙  
爐必親為之值令節必坐母堂上衣冠拜堂下起  
獻酒拱立將撤拜如初五十年如一日弟思諶孱  
而愚思誼衣食之終身年未三十鰥居不更娶曰  
恐有室則於吾弟疎也

周登字大舉桐城人撫亡弟孤子成立弟亡時有  
貲千金托登姪不知比長恣以與之

周自字明德桐城諸生弟覽侵賦有司督之急令  
覽售產於自以償自代輸八百金不受產惟取一  
雕鞍曰弟所以逋賦者太多故爾欲碎之以示誠  
宗人或以請即與之居數年賦仍不杜又納二百  
金覽願以產償自終不忍覽感泣後竟稍克自振  
云

張廷中桐城人兄弟五人既析箸弟業日落廷中  
滋殖曰吾不忍弟之壁立也集諸弟合爨而居久

之諸婦有後言廷中曰吾知厚弟耳安問其他悉以所殖之產五分之仍為輸稅終身怡怡如也

方初字子復桐城人成童即至孝父遘疾溽暑嚴寒不離卧側妻盛氏亦孝人謂初刑于之化焉

黃敦字效仁桐城人有同祖二弟家落鬻產敦曰不可委祖澤於異姓厚直取之弟後日困乏敦曰吾何忍取弟產欲弟知艱苦自立耳今能治生矣遂以產還不取其直

部冠字德纓桐城人以孝聞英親桐梓山每過必泣拜而後行

朱文林字士先桐城人六歲喪父家貧櫛髮為藝竭力奉母母病思魚市無魚文林禱水投竿即得復病篤封乳下一鱗以進母遂愈母卒廬墓豺虎往來不為害竟以哀毀卒

胡琴太湖人母鄔氏早亡繼母徐氏嫉琴琴惟盡孝母疾禱以身代母愈聞之感動母嘗晝卧雖感



二縣令有能聲

程昇懷寧人節婦聶氏子兩次封股愈母疾

盛應魁與葉正奕俱懷寧人以封股稱孝

段正洪懷寧人母葉氏卒會鄰家火將延及正洪  
以身蔽棺號天甚哀忽雷雨大作火隨止

葉日初字寅初望江人萬曆中舉鄉薦時方具慶  
介眉侍壽猶執少儀友愛諸弟館穀悉分給以資  
舉火人稱真孝廉

方祉字子受桐城人兄祿患疫近者輒染癘有死者祉扶抱服勞不離左右祿謂之曰爾乃不畏疫耶曰智者不信幽而棄禮仁者不違道以求生卒無恙兄亦尋愈

朱應麟字仁吾宿松人居陳漢山積倉萬石萬厯戊子虞劉二賊踞長溪兩臺調兵進剿將為清野計應麟奉檄一夕燬盡賊平詔縣給銀五百兩堅辭不受請充客兵之餉



顧槐太湖人事父至孝凡父意所在無不委婉承順父死廬墓三年萬厯間建坊旌表

殷效字子學桐城人繼母夏有二子美衣豐食就傳授書而裁效衣食使之耕效胼胝作苦甘淡泊無難色夕歸濯足更衣侍側色常愉父喜勞之曰惟爾克家食指漸繁爾其尸餐效益奮力乃致千金分給諸弟不以鎔銖自私夏亦感悅遇效有加王鰲桐城人父卒廬墓日夕哀號思慕不已忽夢

父曰兒何不肖我以像鰲曰兒不解畫奈何父誨之既覺舉筆而就酷似其父見者以為神授

徐即署桐城人割股愈父

盛唐桐城人年十二割股療祖母唐父病母張亦割股以救之得愈

朱蓬桐城人兄弟六人淳樸孝友善視母氏宜於兄弟和氣淪浹合力構一堂以居三年又構一室與仲氏次第相及各安其居歲饑有鄰翁貧且病

田盡蕪蓬使其弟服牛為之墾翁不知為誰也異之蓬曰吾力有餘翁力不足故代耕耳

趙之葵桐城諸生性至孝少與方君簡友善以其子逢月受業崇禎丁丑賊至君簡守護母柩死於賊時逢月館白門之葵聞信往哭之發其竒得縗殯殮未終賊復至殺之逢月至今並祀於家

吳忱周字尚文桐城人貢成均父命分產讓之伯季悉無所受嘗夜讀邸舍主婦暈就焉曰若夫吾

友也爾不愧夫吾寧不愧友乎婦慚而退

金韉由新安遷桐城母病值寇亂無從得醫韉剖股以進弗愈又穴其左腹得肝寸許母枕上使聞異香行道者見其屋角炊烟俱如瓔珞雲母啖少許立愈

方夢暘字子旦桐城人嘗焚千金負券渡江適舟人失金相爭夢暘諍曰適吾僮得如其數以償之已而舟人得金所在人稱為長者

金騰高字上達桐城人任俠好義邑大饑出所積穀二千石悉賑鄉里曰所貴夫好義者補天地之不足也豈乘歲祲而自為利乎詔旌其門曰義民李壘字廷玉桐城人籍順天其友汪冕赴廷試病於邸囊有百金付壘人無知者即卒壘為治棺殮主其喪台冕子至京迎喪因以父金還之

方學尹字起莘桐城人葬父奉遺命與繼母同窆學尹不敢違掘穴有石號泣顛天鑿石以厝後徙

墓皆成土矣人以為純孝之感

錢元道桐城人有商主其家既去糞除見遺金約二百餘度商已遠乃置倉中壓以積穀次年商復至言別後失金元道曰此非途中失也發倉示之囊括宛然遂還之

朱東字漢卿桐城貢生晨詣學見道旁遺金弗顧僕曰後人寧不攫之乎乃收之約二百餘金以聞於校官出示招之則糧役王姓所遺也王請分東

笑曰天欲損爾豈令我見速挈去

陳希學字子數桐城人嘗赴試過香爐寺如廁見遺金百餘兩收之居不去僧曰文宗且至何乃逗留曰吾與友約姑待之三日失金者哭而至曰以吾父之嚴而失稅金也進不勝官刑退不勝父刑死矣希學出而還之

張清雅字玉楚潛山人力學養親明季獻賊至父卧病侍湯藥不去既卒甫殮賊又至疑棺藏金銀

欲剖視之清雅以兩手據棺賊斫手仆地幼子起  
藝從牀底躍出求代俱死焉而棺得不剖其僕雲  
滿殯其父子亦不食死

陳廷選潛山人流賊至母老病不能行竊負避草  
間為賊所獲叩頭流血求殺已捨母賊殺之氣絕  
猶抱母不釋手母幸得全其妻收廷選尸殯如禮  
囑其子文露曰姑老矣汝善事之撫棺大慟墜岩  
而死文露援之不及



胡朝烈潛山人割股療母腕痕無血

袁學知字非生潛山人母陳氏病刲股食之立愈  
金道會字仲貞潛山人父客死金陵每一追思血  
淚迸出明季流賊盤踞道會避虎頭寨時荒疫流  
行道會運米得三十石同寨中索貸踵至同室者  
言吾食指浩繁米將盡奈何道會流涕曰誠然然  
不忍人饑而我飽也米盡饑兩日長子承蜩夜冒  
鋒刃審視賊營間道得脫道會歸遇死傷露骨買

棺葬五十餘塚

呂之徵字愈疏太湖人父歿廬墓三年

馬之龍太湖人篤友誼好施予凡人龍官楚藩明季寇亂楚人有為賊掠流於湖者之龍曰此阿兄子民也具貲糧遣之壬午城陷之龍子亦被執至楚彼地亦為優禮送還以報之

汪文煒字純符宿松人母早世隨父避地江左父亡事伯兄如父奉繼母以孝母始苦之後亦為所

感萬歷癸卯舉於鄉歷知靈丘令致政歸產薄不及中人令其子與兄子均之毫無私厚嫁孤姪女一如已女晚歲貧窘處之淡如

石汝修字止所宿松人父歿廬墓三年

田荆字義軒宿松人官省祭幼而喪母繼母駱氏撫養之及長事母孝母喪明母食必親奉母病親嘗湯藥不解衣數月母喪號慟幾絕二弟慈蘭幼荆撫育之田舍分給無私財焉

方友信宿松人母病刲股友信子際明際奎孫孔成孔祐俱刲股和粥救親時稱方氏五孝

張洪猷字伯卿宿松人喪父廬墓三年母疾刲股療之

朱守益宿松人母疾刲股

劉之瑄字朗生宿松諸生流氓至適父病風家人呼出避拒曰父卧牀惟有死守耳賊斫其父瑄以身蔽之連受數刃而死父得免

袁師臯字理衡宿松諸生母老齒脫不能食師臯年已六十必口哺之賊至執其母殺之師臯奮與賊鬪亦死焉事聞旌表

萬民望字兩虛宿松諸生母年八十流賊至負而逃遇賊泣告願以身代賊殺之而贖其母兩臺旌其死孝楊士奇字伯英宿松人辛巳城陷父介八旬被賊執士奇匍匐出救賊已舉刃抱父同死

張璿宿松人乙酉城潰父庠生映光為兵所執璿

給以多金求全父許身為質父得逸去遂遇害

葉應龍宿松人母疾刲股

蔣珉望江人父病刲股

王維翰字思重望江人父疾究心岐黃家言調藥  
進多奇中後以明經訓廬江移辰州教授以母老  
不赴鰥居數十年起卧不離母側母年九十五卒  
維翰哭母遂終

李德寶望江人母病吮癰寢食不離母側二十年

卷一百六十一  
章繼魯字思樸親病顛神求醫必長跪涕泣親歿  
除喪祭祀必哭

王準字明衡望江人父忱生準兄弟獨準食餼即  
自任甘旨易簣遺數十金獨與準準泣拜請公  
分昆弟弟惟乏嗣準憐之同起居飲食二十年惟  
先死有私囊百金舉以報德亦公分諸猶子

阮之鈺字韜甫懷寧人乙酉城潰母老病不能行  
兵至鈺為母請命不許請以身代不許遂挺身障

母格鬪而死子湛九齡得脫於難順治初補諸生  
痛父死孝之烈哭求直指以事聞

詔建坊旌表

方都韓字大方懷寧人居母喪盡禮後父過兵以  
身代父死父得免

吳汝鼎懷寧人早孤傷痛嘔血兄病枯据致參藥  
以餌之嘗忍饑啜粥不顧也

蔣奕芝字鍾韓懷寧人乙酉城潰兵力其母以身



覆之遂死母背上兵為色動母幸得全

黃淡字元味懷寧人城潰母被刃淡與兄中通中德俱以孝死

陳道賓潛山人割產撫孤姪又設義塚葬露骨

劉應甲懷寧人叔父母無嗣病篤遂不應秋試侍湯藥營葬如子鄉里稱之

宣塗字明瞻懷寧人無子妻為置妾見女有戚容詢之知係名家子召其父母還焉

張自孔字石門宿松人廩生性孝資敏年十二隨父避賊見執賊問此處有馬否父未及答自孔紿曰吾家有駒藏在山洞願釋父去取賊從之私與父曰父得生還兒死無恨矣賊久待不至遂引去數月亦脫歸

張應宸字若葵桐城人性至孝親喪哀毀友愛尤篤捐費修城率其兄弟悉力守禦卒無恙歲饑賑粥全活千人舉明經不仕卒聞者皆為流涕

張久中懷寧諸生授徒自給性孝友好義族黨有  
逋課者每捐館穀代償盜入室久中覺之謂曰汝  
良家子也何至此以所存脩金為贈誠令自新卒  
感化復成家業終不言其姓名座右書隨處體認  
天理凡事求近人情二語以自警省後以子清議  
貴追贈朝議大夫崇祀鄉賢

國朝張秉彝字孩之桐城人也生而穎慧為文一本經  
術以廩例入南雍授別駕念兄秉文官四方而父

母春秋高不忍離左右遂謝去里居侍養極意承  
惟秉文為布政殉難山東泣走數千里扶三櫬攜  
貌孤以歸弟秉貞以大司馬卒 京邸

諭賜祭葬悲贊襄成禮弟秉哲孝廉早亡親視含殮身遇  
大喪哀禮兼盡廬墓塚樹交花人謂孝感有祖置  
義田經營墾闢助婚勸學贈給有差修譜牒以收  
族設糜粥以賑饑生平隱德未嘗告人而恭儉謙  
約始終一節晚益邃性命之學以子英貴

特諭賜祭贈文華殿大學士

孟命世字淑子懷寧人順治初征南譚將軍辟參  
軍務以功授知九江府焚刁民誣逆狀保全數千  
家移守端州申免浮糧數萬石初左良玉兵破安  
慶父振邦罵賊死兩弟俱被掠命世徒步數百里  
崎嶇萬狀冒險贖歸卒皆成立

田德產太湖諸生母被亂兵執德產與妻出救求  
代得並釋城陷復負母得脫母歿守墓三年督學

李嵩陽疏請建坊

旌表

劉日暉字致伯桐城人隱居教授母歿年七十猶孺子泣廬墓三年

任塾字克家懷寧人幼為名諸生乙酉城潰兵執其父將見殺塾請以身代兵異之父得脫順治丁酉舉於鄉康熙丁未進士歷任儀部郎督學山左廉聲最著

陳彞字以常潛山諸生事繼母以孝著同學有忤

當事者禍且不測彛挺身直之卒賴以平年三十卒妻宣氏謹事孀姑稱一門雙孝

葉士怡字怡如潛山人明季寇亂奉母避山堡賊獲母脅贖士怡驚產贖回又遇賊母倉卒墜岩傷足負行百里餘未幾卒哀毀盡禮

汪世奕字始遠潛山人幼至性過人八歲喪父哀毀骨立若成人事繼母婉容愉色委曲承歡

張杰字如三桐城人性孝友世父秉文以山東布

政殉城死杰總其家政成立其孤諸子德之割腴  
田以酬固却不受司鐸吳門會郡饑當道委賑太  
倉崑山諸境部署周詳民沾實惠巡撫湯斌欲薦  
之拂衣而退舉鄉飲賓

章于國太湖人性至孝母溺水死于國哀毀絕粒  
倚廬哭泣逾於常制

姚士堅字廷若桐城歲貢篤行好義邑西挂車河  
當孔道多暴漲行者時溺死士堅募造石梁自捐



七白金歲饑賑粥活數千人他所施濟門無虛日  
以故家業中落猶典鬻為之不憚卒之日人皆流  
涕

張瑱字公瑋桐城諸生持身嚴毅厚宗族置義田  
焚負券鄉里德之

左之琮字宗玉桐城人性至孝讀書山中母偶疾  
之琮忽心動急歸人咸異之樂善好施多所全活  
老而嗜學著作尤夥

金恭字尚美潛山人祖業素封俱捐以賑饑嘗典  
衣飾易米三十斛鄰里告急輒散之僅存三斛晏  
如也

周天鳳字羽長桐城諸生少失怙事母以孝稱從  
兄死兩子俱幼捐已屋產以與之族子藻無依收  
育如已子經紀其衣食婚娶俾至成立子四人俱  
孝謹有文行徵出尤積善好義不媿父風孫大璋  
中雍正二年進士

姚士堅字注若桐城人由明經歷官刑部郎中論  
決多平反謝病歸居鄉姍睦設粥賑饑遇貧乏者  
力為周恤甲寅征滇黔兵絡繹經桐吏欲徵費里  
民墜念民力不堪鬻產給芻糧合邑賴以安堵

周斌字允二桐城人性純孝居父喪盡哀節母章  
失明斌朝夕調護七年復明人為孝感撫育亡姊  
遺孤四人伴成立授產與已子均皆世俗所難

方中發字有懷桐城諸生篤學力行嘗捐宇建先

人理學祠刊兩世遺書百卷讓產推財鄉黨皆稱  
孝友舉鄉飲賓著白鹿山房詩集行世

方采賓桐城人割股療父

楊昭雍字南有懷寧諸生性篤孝父病割股療之  
樂為義舉有鬻妻以償逋者為斂財以保全之生  
平力學以程朱為宗著猛省格言克復圖說

張永錫字采遠桐城人性孝既鰥不再娶同父寢  
處父病需蘆根徒步往返百餘里採而進之父歿

隱居不出戶每剃髮則曰身體髮膚受之父母命  
子純謹藏之卒後柩為蛟水所漂失純取所藏髮  
瘞于母墓謂之髮冢

丁藻字以偉潛山人食貧力學敦篤孝義年十八  
路拾楊某遺金忍饑坐雪俟楊至還之楊分金以  
酬拂然而去歲祲欲賑無力徧募粟以濟之

劉士義潛山人有孝行 雍正九年 旌表

姚孔鉞字升初康熙己卯舉人以母老不上公車

朝夕孝養不離左右仲弟牧滄州積逋數千破產  
代償好讀書尤潛心易理 雍正十一年 旌

表

張恭桐城人天性誠篤出嗣李父曲盡孝道父歿  
水漿不入口者三日族有貧不能婚葬者割已田  
為義田以歲入租贍之嘗過金斗見販牛客以賊  
攫金投水救甦恭傾囊償之客賴以歸 雍正十

一年 旌表

姚士黷字東膠峽江令文焮長子性至孝母方疾  
篤刲股和藥以進血迸流衣袖不知其痛楚也庚  
午舉於鄉父歿京邸徒步扶襯歸里哀動行路里  
中孤幼無依與失學者撫養教誨賴以成立者甚  
多嘗容吳中有鬻婦以完宿逋者出囊金代還買  
山數處掩瘞枯骨無算其急難好義類如此 雍

正十三年 旌表

都先覺字依衡桐城諸生潛心理學實踐躬行父

母有疾衣不解帶對人言必泣下家貧授經於外  
父母所欲必力致之色偶不懌長跪終日俟其顏  
霽而後起里中共推為純孝云

江萬里字遠公桐城諸生性孝友析產以腴者奉  
三兄自受其瘠者後三兄家落仍以已產與兄子  
共之歲饑捐米數百石賑濟里稱篤行君子

張若霖字巖舉大學士英冢孫少詹事廷瓚長子  
年十一母卒哀毀骨立如成人事父曲盡色養尤



善承繼母歡母亦忘為前母子也與弟需相友愛  
需歷仕浙東粵西霖每寄書必戒以官箴勗以祖  
訓生平寡言笑性恬淡家世貴顯霖處之如寒素  
杜門却掃不輕交接然邑有公事不憚指陳利弊  
遇水旱力為募賑所全活甚衆歿後鄉人思之多  
流涕者

王曰貞字德水桐城人孝事繼母弟被盜挺身出  
救盜感而去屢償姓逋明末歲祲設粥廠於家存活

甚衆嘗遊姑蘇值閭門大火罄舟米二千餘石給  
之蘇人為之勒碑每歲施棺槨無算順治丁亥出  
粟賑饑至於鬻產迄今稱之

徽州府

唐黃尚飲人割股為羹以愈繼母病父卒廬墓終身  
墓側產芝及連理木貞元十九年旌表

吳九郎休寧人黃巢寇至舉義兵保鄉井與賊戰  
不利衆潰馬上自刎奔逐半里許身方墜地馬亦

死鄉人即其處立祠祀之名其地曰倒馬墩

宋王六飲人母凌目瞽草屋半間風雨不蔽去依親  
金氏久而厭之時六甫九歲掖母歸故址刈薪易  
米以養事間旌表

祝確字永叔歙人親喪廬墓兄弟先後死熙河確  
往返萬里以歸其喪吏部朱松為諸生時確歸以  
女生熹郡城遭方臘之亂朝議徙治溪北潦漲為  
患確倡衆訴於朝復如其舊

程四欵人幼孤鞠於姑家姑病革四省問退曰吾  
幼失怙恃姑猶母也誓當報德乃焚香取髓粥而  
進之姑之疾遂愈

夏休寧人早孤孝養其母母卒廬墓墓生瑞竹  
又生芍藥並蒂者二鄉人號其室曰雙應

曹矩字晦之休寧人景祐進士官屯田郎中妣贈  
父汝弼燎黃之夕芝產塋上事聞詔賜所居為孝  
芝里從父文死方臘之難世稱忠孝

陳克己與鮑乙俱休寧人陳割肝鮑鑿腦以愈母

病

汪廷美婺源人百口聚居食必同席親喪盡哀祥符中減賦美亦減其佃租有鶯香者去後發其裹得金追還之里人竊其鶯問之曰將以祭先美更助以魚酒有從質麥種者過期言種敗無收美還其質更遺以麥時號為汪長者

王德聰婺源人少孤孝友信義為里所稱一家幾

千指同居七十餘年矣天聖初奏旌

張珏字公予婺源人弟滋坐罪誤當死珏曰吾力  
單微養母不如弟自拘於吏遇恩徙遠以是見知  
後以軍功得官朱子稱其天資孝友有古篤行君  
子所難能者

詹惠明婺源人父坐法當死惠明詣縣求代不許  
獄上惠明復詣郡請嚙指出血詞甚哀不見省方  
盛夏伏府門外以艾自灼其項明日至庭下復割

右耳擲廳事上血淋漓守大驚竟為奏報詔減其  
父死而釋惠明

許規祁門人常容宣歙間旁舍某郡人病且死出  
囊中金以骸骨屬之及死規舁棺從千里外畀其  
家人并還其金

汪懃婺源人父復道判揚州德祐末兵至復正坐  
不去兵欲執之懃以刀拒斃一兵左右負復走衆  
遂殺懃丞相馬廷鸞以書唁曰能執干戈以衛父

母世不乏童區寄矣慙年十四云

元鄭安字子寧歛人宋亡明年李世達叛富珠哩敬將屠城安叩軍門曰亂僅世達一人耳民何罪而欲屠之敬乃止既沒鄉人祠之

鮑元鳳歛人元季寇亂鳳與妻子訣曰吾有母不能爾恤遂躬負母深避巖穴亂定歸薄暮恍若神導與妻子遇俱獲全

黃一清字清夫休寧人母病革一清額天願減已



算以益母壽夜夢人曰明日老嫗來當得藥旦果有嫗授以啖蜜法乞蜜隣鄉夜還過虎號泣曰我死不足惜如母蜜何虎熟視而去

戴焞字晉翁婺源人父卒與二弟焮焯廬墓三年朝夕奉盥上食如生客至兄坐弟立老而不懈

朱震雷休寧人累世同居

明葉仁休寧人父宗茂饒州知府坐事罰輸築城仁上書請贖罪太祖嘉其誠宥之

汪葵黜人生元末每晨多造飯攜斧入山至暮乃歸妻怪而問之笑而不答又嘗煮芋菽搗粉築牆人莫之覺及土寇為亂葵隱入山柴舍宛然村落中有積糧葵部分居之時以芋牆充食存活甚衆洪宏祖字深遠歛人為郡守陳彥回所重靖難兵起宏祖白守勤王成祖即位收彥回宏亦投水死汪存字廷堅歛人隨父商歸宿邑之汝灘天未明父捨舟先歸人言前路有虎存冒雨追四十里始

及父果遇虎山陬存泣告天曰願虎傷已勿傷吾  
父虎竟去

畢文璟洪祖鮑文行與李士景四人俱歛人割股  
以愈母疾

畢陽幼以孝聞父卒泣血喪明母疾露禱求以身  
代割股和藥進之疾愈

何澄字應清歛人割股愈母疾出繼族父後有爭  
繼者澄推讓田產無所取惟歲時祀事不怠

吳鼎欽人與兄鼎弟珊容黃州衆夜鬪殺人誣鼎  
吏捕之急鼎不知所出鼎曰兄年高未有子弱弟  
老母所憐皆不可死獨鼎子已長願代兄以塞禍  
遂請吏就繫鼎究之求直不已鼎謂曰空自苦必  
無生望不若保餘貲善事老母撫弟姪立門戶毋  
以弟為念也其夜具衣冠自經死州人傷之白府  
禮殯焉

黃鑑字德昭欽人父久商不歸鑑兒時問父安在

輒號泣不食家貧拾薪養母年十四告母行訪其  
父至黃州境得之

許象先字汝賢歙庠生父歿於淮奔喪盡禮繼喪  
母越十五日以毀卒

王靖字寧之祁門人嘗慕張公藝行誼百口同費  
尺布不私成化丁酉鄉薦授交河知縣人稱其節  
操

方尚用歙人父患痢疾剗股煎湯以進隨愈後尚

用病將絕以不能終養為恨迨母病夢尚用跪告  
曰惟孳齋可治如言果痊宗鄰咸詫其生死盡孝  
程邦仁歛人弟邦儀死於仇誓死以報體肥不耐  
步履每日負襆被身挂二尺竹筒盛水漿於中庭  
疾趨百回約三十里乃止日以為常人疑其顛久  
之遂健行聞沈東山為郡司理乃徒步走燕邸訴  
弟寃沈哀之抵徽遂閱故牘出邦儀屍驗之邦仁  
撫之慟竟絕是日觀者千人哀聲動山谷沈雪其

寃卒論抵

許立德字伯上穀長子母汪氏病噎不下食立德亦不食母沒哀毀死三日復甦彷彿見母送之歸母葬廬墓側日夜悲號父佯稱病召之返侍父時念母慟哭父亦慟後恐傷父心每欲哭輒掩面走他所盡哀乃還例當受廕屢讓其諸弟

胡之憲歛人母病篤憲年十歲其姊玉娥年十三相向痛哭憲謂姊曰聞危病惟割股可救遂同拈

香告天剗肉和粥以進母遂愈事聞旌表雙孝之門

程周字希旦歛庠生父病周割股和糜以進明年族人利其產誣周殺父幽狴犴者三年遇朝審周至庭下忽風雨大作及開釋天日清朗周父死三年貌如生邑令乃以鼓樂導送歸家

吳榮讓字子隱歛人父歿於楚榮讓十四歲即往尋舟覆鄱陽湖緣木獲免得父骨於襄陽棗蔕誌



之越十年再往昇歸後遞葬高曾以下及親戚之  
無主者九十九喪建宗祠置義田義塾天啟間旌  
表

江應全歛人父沒兩月而生遇父忌輒悲號事孀  
母色養盡歡母疾與妻割股以進居喪哀毀負土  
成墳廬於墓側事聞旌獎

吳公逸歛人少失父母伯兄病劇仲兄困於訟咸  
竭力救之年終計族人老幼授衣粟歲凶力行賑

恤後病篤屬子允復輸萬金佐公家之急奉旨旌  
義贈官

汪徽壽欽人好施子濟貧窮建橋梁焚券約義聞  
鄉曲

吳修休寧人事母孝火起鄰家修抱母號泣籲天  
獨免延燒母卒廬墓羣鳥來巢

程琦字廷珪休寧庠生父病疽琦躬吮之父嗜薯  
琦終身不忍食嘗授徒遠鄉趨母病夜行峻嶺顛

蹶中若兩燈前導及入境始知其為虎也人共竒之  
詹侃字時選休寧人選閔縣尉迎養母母病咳  
夜需湯侃寢榻下聞咳即起嘗割股沸湯以進母  
卒哀毀股創迸裂而沒

金彥文幼孤舅奪母志撫育於祖祖老採薪以養  
母復寡迎歸病祈代沒廬墓一夜虎過不害人驚  
異之

汪讓年八十一夢神告賊發其塚奔視賊覺而逸

因廬墓側病革始與歸嘗夜行有猛獸當戶探之  
甚溫詰朝跡其處已嚙犬去矣里中五谷神為厲  
讓檄而滅之汪循為讓作鐵漢傳

吳應麟字伯端休寧人幼孤依祖祖沒哀毀骨立  
每念父不逮養終身屏絲竹弟已析產後喪其貲  
又分已貲以與之

黃侃休寧人生平卓犖嘗條陳淮南社鹽筴利弊  
使者稱善居家收族建祠置義社義塚義田他如

黷宮白岳倉庾道路諸役侃恣與焉入粟佐國詔  
樹坊褒義

洪什字承章歛人母黃氏二十而寡什事母盡孝  
服賈家日起力為善事賑乏困救災患不計恩怨  
一以厚道施之汪道昆傳其行

汪德壽休寧人居親喪淚盡繼血廬墓三年足不  
踰戶

汪尚質字賓塘休寧人少孤事兄撫姪盡恩誼四

世同爨無間言

吳繼良字君遂休寧人母亡事遺像如生兄弟相  
禮讓構義屋置義田以居食貧者輸郡邑學田又  
輸還古書院膏火葬戚屬贖人子女乳活遺嬰表  
揚貞烈施粥救饑所行善事甚多

金九苞休寧人割股廬墓

方瓘歛人厭科舉業絕意仕進從廣東湛若水學  
歸時同行友死舟中例不載屍瓘秘不告人與同

寢累日至昭州始發之

吳仲成休寧人成化間以孝旌

許欽績溪人弘治時以孝旌

李仕昌婺源人兄仕選為仇家誣構殺人逃匿逮  
仕昌擬抵罪弟仕昭訴曰縱兄逃者我也願以身  
代仕昌曰兄逃我長我當其罪二人爭求坐竟為  
疑案後令至明其誣釋而旌之

祝孟謙字志讓婺源人嘗輸粟千石賑饑先是兄

孟資亦輸粟六百石以賑有司上其事建坊旌表  
余鎬字宗京婺源人父廷璨寃繫縣獄獄大疫鎬  
自縛詣郡求代父死許之父得出後鎬亦免

曹永護字義干婺源人性寬廣犯而不校遇荒歲  
月杪必密察隣家之急陰餽之不以語人

汪汝和字守介婺源人故人逋皇木帑八百緡繫  
獄和竭資代納不責償有鬻妻以納糧者不忍離  
其子哭之哀和代輸而止其鬻前後焚券累數千



金郡守榜其名於旌善亭

汪思智婺源人隨父解軍南京歸舟父卒智恐舟人棄其屍以身掩護日兼人食又時作呻吟聲七晝夜抵饒州城始發喪

曹玘婺源人義烏方時成幼喪母出亡資盡將赴水死玘活之助錢令習業期年父尋得之泣拜去族人宥宿負玘一日醉過諸塗疑玘將責逋粹玘泥中逸去玘不與校明年大饑復贈之米還其舊

券

曹孜學婺源人三歲喪父甫九齡兄弟欲析箸孜  
學泣曰奈何忍分手足耶伯仲感之復同居十餘  
載後伯仲緣事繫京師孜學傾產往救坐是貧落  
無怨言

謝用祁門人其母馬氏妾也生用五月嫡棄夫客  
外嫁之東都而委鄰家鞠用用長知故扼腕飲泣  
托游學徧訪數年東都人且死馬氏流落攜幼子

自江右來相遇於逆旅哀感行路迎歸奉養事嫡母尤謹有司奏旌其門

馬祿祁門人客旅舍友人以四百金寄祿同舍者盜金亡去祿秘不言罄已資償之已而盜敗友人始知具酒謝之還其銀祿竟不受捐為修學之費汪宗淮祁門人父客亳州娶妾宋氏生宗淮三歲父亡隨嫡扶櫬歸母宋氏改適陝西比長念母出潼關抵鳳翔徧覓一日風雨偶憩道旁見一老嫗

荷鋤而來問答相符即母也抱持痛哭奉以歸

洪應培

陳邦賢

謝廷薦皆祁門人割股療親

疾

謝世麟祁門人父久客無音耗世麟千里尋歸父  
母相繼病篤割股救療嘗捐資修明倫堂建聚奎  
堂

余枝華黟人父久病華亦七十侍疾卧榻逾年罔  
懈度間忽湧泉以供汲人詫孝感

汪文保黟人嘗拾遺金二百金於路止客舍訪得  
邠人謝氏悉付還分金酬之不受事聞太守召使  
受叩頭辭守謂謝曰報德途寬汝何以金強人謝  
俛首曰小民有兩女願結姻守曰善問文保子幾  
人曰子八人有孫乎曰三十三守起立舉手加額  
曰有是德宜有是福取果酒鼓樂送歸

葛泰績溪人母病萬思食生梅時已八月泰但遇  
梅樹輒泣竟得生梅二顆食母病遂愈

程伯祈績溪人事親孝謹父卒廬墓插竹編籬有  
枯竹生筍之異

朱廣績溪人割股廬墓

方正績溪人母孀居正兄弟孝養卒建蓼莪館於  
墓左朝夕哭奠狀聞荷節孝之旌

四  
胡仲俊績溪人割股療親修橋賑饑卒年九十有

汪文言休寧人少孤貧補縣吏智巧任術負俠氣

入長安為監生游公卿間葉向高用為中書舍人  
受知於楊連左光斗諸君子魏忠賢嫉科臣傅魁  
疏劾光斗詞引文言逮下獄鍛鍊兩月弗承廷杖  
之百革為民其甥悲夫聲文言叱曰孺子真不才  
死豈負我哉後忠賢將殺楊左復借口於文言復  
逮下獄嚴鞫者四欲誣楊左諸人以贓文言蹶起  
曰天乎寃哉以吾口鱗君子有死不承卒斃於獄  
江天一字文石歛諸生深沈多智為同郡金聲所

知佐聲用軍法訓練鄉人子弟後被執聲曰子有  
老母不可死對曰天一同公起兵可不同公殉義  
乎遂偕死

楊泗祥字瑞呈休寧人父卒未葬土寇猝至家人  
遠避獨守柩不去寇戒勿犯復還古書院田創紫  
陽六邑文會好義不倦

國朝張正茂字如松歛縣人父篤老病卧十餘載正茂  
躬滌天沒親調饋餌曾無倦色嘗買婢詢知其父



無他息即還之不責值善詩古文有集

項繼成歙縣人年十四刲股療繼母疾宗族欲為請旌繼成泣謝曰此非為名且不欲令吾母知之也

金應忠休寧人偕弟出游遇寇弟曰兄能事母寧殺我兄曰弟未有子寧殺我賊義而釋之

程大任字元勝休寧人任俠好義有張姓貧鬻其妻濟以金得不鬻有豪擗其篋言於獄為力雪之

唐祁欽縣人少即出游治生以養親親沒遂不出  
父嘗貸某金後某偽以失券告祁曰券雖無事則  
有也償之既而他人復以前券來曰事雖偽券則  
真也又償之人傳為笑曰吾感其初能急吾親耳  
疾草語其子曰力能濟人自親族始母見德母市  
名

汪思孝婺源人鰥石梁以防溺置義田以贍族設  
義塾以訓貧子弟遠近稱之

程六德字侯倩休寧人幼穎異聞塾師說孟宗王  
裒諸故事輒流涕長力於學母卒水漿不入口旬  
日以毀卒

唐道林績溪人國初土寇竊發拘兄道俊索金贖  
命道林入賊窩代死道俊子葵以父禮服喪三年  
胡名儒休寧人尚義任俠其世父流離湘漢間名  
儒訪歸奉養親友婚喪有不給者拮据助之

程世鐸歙人父買於滇遭吳逆變絕音耗鐸告廟

尋訪五年遇父於烏蒙奉歸盡養 雍正三年

旌表

汪龍字時六歛人祖容死於蘇父往迎柩復溺於  
采石時龍方六歲及冠出覓祖父棺晝夜號泣感  
神告得之 雍正三年 旌表

楊嗣勃字鶴臯休寧人事親孝老彌篤從兄為山  
賊所掠嗣勃微服造其壘獻資求釋 雍正五年

旌表

孫鳳翮力耕負販供祖父母及母甘旨母以哭夫  
目盲翮清晨長跪舌舐逾年復明 雍正七年

旌表

趙照字公泳八歲侍父疾人稱孝童母病禱北辰  
有燭光交焰之異兄弟同居無私財 雍正八年

旌表

金慶治休寧人母喪哀毀尋亦病歿有建宗祠養  
孀姑撫諸甥郵母族諸義舉 雍正八年 旌

表

朱元儼休寧人十歲父病籲天求代母患疽儼以舌舐得痊親沒廬墓歸未一月而卒 雍正十三

年 旌表

汪鼎和字公調休寧人父嬰疾禱天求代歲饑捐賑

戴為轅字季環休寧人少孤貧先墓在和村界濕地欲改築力不逮乃痛自刻責不飲酒茹葷隆冬

却絮曰先人魂魄不安吾敢戀輕煖乎後容吳興  
卜吉羅山歸啓墓則水溢棺腐號慟欲絕易柳赴  
墓遂廬墓側

金聲基字印初休寧人幼有至性三歲母為捉蟲  
白母曰兒喫母乳無異蟲喫兒血遂自斷乳親沒  
廬墓三羊山故多虎不懼虎亦遁跡

程浚字萬人歙人歲貢生事嗣父母及本生父母  
俱盡孝合葬四棺於一塋嘗陳亭戶疾苦容吉安

值茶陵兵變代守土官區畫拒守計城以得全

王朝珮婺源人歲貢任繁昌教諭居家孝友置田  
贍族發困賑饑著培桂堂集

汪光翰字文卿婺源人明季客川南道胡恒慕恒  
闔門死獻賊惟媳朱氏與幼子得脫光翰聞闕保  
護歲大祲斗米十金光翰或服賈或課蒙稍獲贏  
餘給其母子經二十餘年不倦蜀平道通送還景

陵時稱義士



汪晉字庶蕃歙人寄籍江寧諸生嘗構宗祠置義  
田以成先志篤於友愛白首無間言自給甚約而  
周急拯危不少前却



江南通志卷一百六十